

Kali i jes wantem wan fren nomo.

# Miwan long Lanj Taem

I Kam long Stacy Lynn Carroll  
(I folem wan tru stori)

*"Tabu Spirit i toktok wetem wan kwaet smol voes" (Children's Songbook, 105).*

Kali i wokbaot i go long rum blong kakae lanj, mo i luk raon. Evri nara pikinini oli stap ron stret i go long ol fren mo oli stap kam tugeta long ol tebol. Rum ia i gat fulap noes wetem ol voes we oli glad tumas mo hapi laflaf. Hem i nambatu dei long skul, be i luk se evriwan i gat wan fren blong sidaon wetem, be Kali i no gat.

Kali i holem strong handel blong bokis kaekae blong hem, mo i wokbaot i go long wan long ol tebol. "Mi save sidaon kolosap long yu?" Kali i askem.

Wan gel wetem longfala braon hea i lukluk i go antap. Hem i laf smol mo i seksekem hed blong hem. "No. I gat wan finis," hem i talem.

"Okei." Kali i muv long wan nara emti jea mo i putum gud bokis kaekae blong hem.

"Yu no save sidaon long ples ia! Mi bae mi sidaon long ples ia," wan boe wetem wan grin sot wetem laen i talem. Hem i pum bokis kaekae blong Kali i go foldaon long floa. Ol fren blong boe ia oli laf.

Kali i bendaon mo pikimap bokis kaekae blong hem bakegen. Hem i wokbaot i krosem rum blong kaekae ia mo i sidaon long wan emti tebol. Hem i luk wan we i slip long sem eria blong hem, mo i traem blong sakem han, be boe ia i luk long nara ples. Kali i mekem fes blong hem i nogud. From wanem i no gat wan i wantem kam fren wetem hem?

Kali i luk i go daon long kaekae blong hem. Hem i no filim hanggri nao. Hem



i waepem ae blong hem, i sarem bokis kaekae blong hem, mo i wokbaot i go aotsaed.

Evriwan i stap pleplei wetem fren blong olgeta finis. Kali i sidaon hemwan long wan stul, mo i lukluk ol nara pikinini oli gat gud taem, be i no hem. Afta, Kali i bin luk wan boe we i semmak yia olsem hem, i stap sidaon hemwan long gras. Hem i wetem wan yelo sot we i gat wan mak long hem, mo hea blong hem i go antap long bak blong hed blong hem.

Kali i lukluk i go. Hem i bin luk wan grup blong ol gel blong klas blong hem we oli stap plei fo skwea. Hem i wantem tumas se bae oli invaetem hem blong plei wetem olgeta.

Kali i lukluk long boe ia bakegen. Hed blong hem i bendaon, mo hem i stap pikimap gras raon long leg blong hem. Kali i tingbaot wan samting we Mama blong hem i stap talem samtaem: *Lukaotem ol pikinini we oli stap olgetawan.*

Kali i mekem fes blong hem i nogud. *Hem* tu, hem i stap hemwan. I no gat wan i stap traem blong kam fren *blong hem!*

Be afta, Kali i tingting abaot taem we hem i kasem baptaes long las yia. Hem i bin promes blong stap lisin long Tabu Spirit. Mebi Tabu Spirit i stap helpem hem blong tingbaot wanem we Mama blong hem i bin talem long hem. Mebi Tabu Spirit i bin stap traem blong talem hem blong go pleplei wetem boe ia wetem yelo sot.

Kali i pulum win, mo i stanap. Wan gud filing

i fulumap hat blong hem. Hem i wokbaot i go, i sidaon long saed blong boe ia long gras.

Hem i talem: "Halo,"

Hem i talem slo: "Halo."

"Wanem fevret kala blong yu?"

"Ah . . . grin."

"Hem i gud. Mi laekem pink," Kali i talem. "Yu yu gat wan fevret animol?"

Boe i sidaon i stret smol, mo i lukluk Kali. "Yes. Mi rili laekem ol daenosol."

"O, be mi tu. Fevret blong mi i wan traeseratop."

Boe ia i smael.

Afta, bel i ring. Kali i stanap, mo i talem tata long boe ia. Hem i smael taem hem i stap wokbaot i go long klasrum blong hem, hemwan. Maet hem i no gat wan bes fren, be hem i filim hapi blong save se hem i bin mekem spel taem blong wan narawan i gud smol. ●

*Hem we i raet i stap long Yuta, YSA.*



Mi bin hariap we hariap blong go long skul. Be mi gat filing ia se mi mas go tekem wan paket poteto jip long hom fas-taem. Afta long lanj, fren blong mi, Drew, i luk olsem se hem i no hapi. Mi askem hem wanem i rong. Hem i talem se hem i fogetem kaekae blong hem. Mi tingbaot ol jip blong mi, mekem se mi givim i go long hem. Drew i talem: "Hemia i wan samting we i moa naes we wan i bin mekem blong mi long skul."

Durham M., 11 yia, Yuta, YSA

